

B. N. C  
FIRENZE  
1 0 7 0  
36



XXV  
VERI  
14

1070.36






4870 86

LETTRE  
DE  
CONSOLATION.

A MONSEIGNEVR LE  
Duc de Montmorency , sur  
le trespas de Monseigneur le  
Connestable son Pere.

*Par le Sieur de NERVEZE.*




A P A R I S.  
Chez Anthoine du Brueil, rue sainte  
Iacques à la Couronne.

---

M. DC. XIII.

*Avec Privilege du Roy:*









# LETTRE DE CONSOLATION.

*A MONSEIGNEUR  
le Duc de Montmorency sur le  
trespas de Monseigneur le Conne-  
stable son Pere.*



MONSEIGNEUR,  
I'ay laissé passer la  
viue voix de ceux  
qui vous ont vi-  
sité en vostre affli-  
ction, afin que le premier appa-  
reil qu'on y a appliqué par l'o-  
reille donnaist à mon discours le  
passage de vos yeux plus libre, &  
luy fist trouuer vostre esprit plus.

disposé à la consolation : vous  
auez perdu vn pere, & la France  
vn Connestable qui auoit toutes  
les qualitez accordantes à l'vn &  
l'autre nom pour estre aymé &  
honoré de ses enfans, chery &  
respecté de tous les François : sa  
dignité (fatale à vostre maison)  
luy estoit d'autant plus glorieuse  
qu'elle luy auoit esté donnée par  
vn grand Roy de qui le iugemēt  
& l'experience redoubloient la  
gloire de ceux qu'il honnoroit  
des charges & offices de sa cou-  
ronne, si bien que pour digne-  
ment louer sa memoire, il  
faut dire seulement que Henry  
le grand le choisit pour estre son  
Connestable, puis que ce choix  
(estant vne relation de ses rares  
vertus) comprend en soy tou-  
tes les louanges qu'on sçauoit

donner à ses merites : Ce n'est pas, MONSIEUR, que ie vueille icy remplir le temps & le papier d'eloges & d'honneurs tels qu'ils sont deubs à feu Monseigneur vostre pere, ie les borne en ce peu de mots, & laisse à ces grands Orateurs & lumieres de doctrine que ce siecle voit reluire à les estendre plus auant & dignement, afin d'esgaller les ornemens de leur eloquence à ceux de leur matiere: M<sup>on</sup> but est seulement de contribuer quelque chose à vostre consolation qui auroit beaucoup de raisons pour estre receuë de vous, si la bonté de vostre naturel ne disputoit pour son interest le prix de la douleur. Mais si faut-il en fin que les tendres mouuemens de la nature cedent aux loix de la

prudence, & que vous confideriez que la meſme nature qui defend & ſouſtient voſtre regret vous menaçoit tous les iours de la perte que vous auez faicte, mais voſtre amour filial qui ne ſe pouuoit accorder à l'imagination de ceſte neceſſité vous empeſchoit de vous y reſoudre, & vous perſuadoit que la vieilleſſe de feu Monſieur voſtre pere auroit de nouueaux delais pour respirer. Ainſi vous le cōſideriez pluſtoſt comme vn pere de qui les iours vous eſtoient chers, qu'en homme vieux qui approchoit de ſa fin : Il a veſcu quant à l'aage tout le tēps qu'un mortel peut humainement deſirer, & quant à la vertu, il vit & viura touſiours, car ceſte vie qui n'a point de mort triomphe des an-

nees: le degré où sont les vostres,  
 & l'estat de vostre condition  
 vous doiuent seurer du soin pa-  
 ternel qu'il auoit de vostre per-  
 sonne, & vous faire plustost  
 plaindre le dommage public  
 que le vostre particulier: car la  
 Francey est plus interessée que  
 vous, à le mesurer par le besoin  
 plustost que par l'affection, la-  
 quelle comme extreme opinant  
 la premiere en vostre cœur, &  
 troublant les aduis de vostre  
 propre raison, vous fera sembler  
 ceste perte fort dommageable  
 & insupportable pour vous,  
 mais elle l'est dauantage pour le  
 public, car bien que cest arbre  
 (dōt la tige est si antique & illu-  
 stre) semblast trop vieil pour  
 produire encore quelque fruit,  
 & que le temps l'eust desia cour-

bé & incliné vers ses racines, si  
 est-ce que l'ombre en estoit en-  
 cores vtile & necessaire à cest  
 Estat, où son nom seulement  
 estoit vn appuy aux loix & à la  
 tranquillité publique. Ceux qui  
 ont cogneu sa vie sçauent com-  
 bien il estoit ialoux de l'honneur  
 de son Prince & du sien, & le  
 iuste chastiment qu'il faisoit de  
 l'iniustice, comme si son espee  
 de Connestable eust esté celle de  
 la iustice mesme. Je dis cecy,  
 Monseigneur, pour tirer du  
 suiet de sa gloire celuy de vostre  
 consolation, vous estimant heu-  
 reux d'auoir esté engendré d'un  
 pere si vertueux & si plein de  
 perfections que la nature luy a-  
 uoit hereditairement donnees,  
 comme elle a faict en vostre en-  
 droit, afin que successiuent  
 de

de pere en fils ce nom fameux de Montmorency soit orné & illustré des qualitez conuenables à sa grâdeur, à laquelle vous pourrez adiouster de nouueaux ornemens si la suite de vos belles actions imite leur commencement, & que vous accomplissiez l'esperance que vous donnez à toute la France, & particulièrement à la Prouince où vostre predecesseur vous a laissé avec ses derniers souspirs la charge qu'il y a si longuement & heureusement exercée: Prouince où il a esprouué l'une & l'autre fortune, la bonne par sa prudence & sage cōduite, la mauuaise, par la rigueur & malice du temps: & en toutes deux il a triomphé de la fortune mesme, dequoy le Languedoc portera à iamais tes-

moignage, & honoré en vostre  
 personne de ses viuātes reliques,  
 pensera tousiours voir son an-  
 cien gouuerneur aussi bien que  
 son image: Il vous a laissé sa pla-  
 ce au temps que vous estiez ca-  
 pable de la tenir, & en ses biens,  
 & en vne partie de ses charges,  
 la nature vous faisant succeder à  
 l'vn, & le merite à l'autre. Ainsi  
 à iuste tiltre vous heritez à ses  
 fortunes, dont la plus releuee  
 semble ne vous estre désniee  
 que par la foiblesse de vostre  
 aage, & à laquelle toutes-fois  
 vous pourrez vn iour pretendre  
 si vous suyuez les traces glorieu-  
 ses de vos Ancestres, de qui les  
 Monumens, illustrez de ceste es-  
 pee de Connestable, vous serui-  
 ront de tiltre pour la demander,  
 si les exploicts de la vostre pour



le seruice du Prince rendēt iuste  
vostre demande. Car bien que  
ces honneurs se trouuent cōme  
fondez en vostre maison, leur  
droict est en la seule vertu, &  
non en la naissance. Or Mon-  
seigneur, la memoire de ce que  
vous estes né vous est vn si  
poignant esguillon à la gloire,  
qu'il y a apparence que vous  
esgallerez le merite de vos bel-  
les actions à l'illustre grandeur  
de vostre race. Penlez donc  
plustost à suyure l'exemple de  
Monseigneur vostre pere, qu'à  
regretter son trespas, qu'il a veu  
yenir lentement à pas comptez,  
comme si Dieu l'eust attendu à  
l'extremité, & ne luy eust voulu  
faire payer sa debte qu'à sa com-  
modité, & à sa volonté. Aussi  
n'a-il point abusé de ceste patien-  
ce, & se recognoissant debiteur

de bonne foy luy a rendu paisiblement & sainctement la vie qu'il luy auoit prestee, dequoy ses derniers sanglots rendent vn si deuot & louïable tesmoignage que les plus religieux y ont recueilly des exemplaires de pieté, & des preceptes de penitence. Heureuse mort, glorieuse vie, laquelle apres auoir esprouué en guerre les perils des combats & des batailles, auoir ressentý mille trauerses par les assauts de l'enuie & les troubles d'vn Estat diuisé, gousté la douceur des honneurs & des delices du monde dans vne longue paix, & la faueur des Rois, & bref, tout ce qu'il y a de doux & d'amer en ceste vie, est venuë à la fin rendre les abois dans le liët d'vne mort pacifique au milieu des Sacremens, entre

les bras de personnes sacrees, de  
 ses plus chers amis & fideles ser-  
 uiteurs, ayant vsé dignement &  
 Chrestiennement de ce grand  
 loisir & relasche que la mort, ou  
 plustost Dieu mesme luy don-  
 noit pour bien mourir. Qu'il re-  
 pose bien heureux & glorieux  
 avec la couronne que meritent  
 ceux qui vont si glorieusement  
 au bout de la carriere: Il a empor-  
 té le prix de la course, & son ame  
 a esté aussi adroicte à courir vers  
 le ciel que son corps l'estoit dans  
 les courses & carrieres du mode.  
 Cependant, Monseigneur, vous  
 louerez Dieu de ce qu'il vous l'a  
 raui si à temps & à propos, qu'il  
 vous sera desormais facile de  
 vous passer de luy, bien qu'estât  
 plustost perdu pour vos yeux  
 que pour vostre cœur, la perte

vous en sera tousiours presente à la memoire. Il a eu ceste satisfaction auant mourir, de vous voir en condition de pouuoir perpetuer son nom & sa race, si bien que rien n'a defailly à son contentement, sinon qu'il eust peu laisser la France en estat plus pacifique qu'elle n'est : mais cōme la vie n'a point ses contentemēs parfaits, la mort ne les a pas aussi, principalement pour ceux qui regardans au bien public, soit temporel ou spirituel, ont tousiours suiet de plaindre charitablemēt les suruiuās : enquoy sa douleur estoit d'autant plus loüable qu'elle tient de la pieté deuë à son prochain, à son pays, & à son Roy. Appaisez donc vos regrets, Monseigneur, & vous seruez plustost de vostre

raison que du vulgaire remede  
 que le temps apporte aux affli-  
 ctions humaines. Vostre iuge-  
 ment vous le persuadera mieux  
 que moy qui ay plus d'affection  
 pour vous sçauoir honorer, que  
 d'esprit pour vous pouuoir con-  
 soler. Je prie Dieu comme pere  
 de consolation,

MONSEIGNEVR,

De vous departir la sienne, &  
 vous combler, vous & vostre  
 posterité, de ses graces & bene-  
 dictions diuines.

*Vostre tres-humble, &  
 tres-obeyssant seruiteur,  
 NERVEZE.*

*Extraict du Priuilege du Roy.*

**P** Ar grace & priuilege du Roy, il est permis à Anthoine du Brueil Marchant Libraire Iuré en l'Vniuersité de Paris, d'imprimer ou faire imprimer, *Les Oeuures du Sieur de NERVEZE*, nouuellement reueuës, corrigees & augmentees par luy-mesme. Et deffenses sont faictes à tous autres Imprimeurs & Libraires de ce Royaume, de les imprimer ou faire imprimer, soit ensemblement ou separees; ny en extraire aucune chose, sans le congé & consentement dudit du Brueil: pendant le temps de dix ans entiers & accomplis, sur peine de confiscation des impressions qui en seront trouuees, & de deux cens escus d'amende, applicables, moitié au Roy, & l'autre audi& du Brueil, & de tous despens, dommages & interests, comme plus amplement est contenu & déclaré es lettres dudit priuilege, Donnée à Paris le II. Mars, 1605.

*Par le Roy en son Conseil.*

BRIGARD.











MC

